



partii naleraq

UPA 2017/47 183-01

03.05.2017

Illoqarfinni annerusuni arfineq marluusuni ungasissumiit kiassarnikkut, innaallagissamillu kiassarnikkut ullumikkuminngarnit suli annerusumik atorluaanerulernissarput siunertaralugu, Naalakkersuisut suliniuteqaqqullugit peqquneqarnissaannik Inatsisartut aaliangiiffigisassaattut siunnersuut. Illoqarfiit pineqartut tassaapput Ilulissat, Qasigianniguit, Aasiaat, Sisimiut, Maniitsoq, Nuuk aamma Qaqortoq.

(inatsisartunut ilaasortaq Peter Olsen, Inuit Ataqtigiit).

Ulloq 1. Januar 2018-imut qitiusumik kiassaateqarfinnut kissarsuuteqarfinnullu il.il. Namminersorlutik Oqartussanit toqqaannangitsumik toqqaannartumilluunniit pigineqartunut tamanut piginnittuunerup, akisussaanerup, ingerlatsinerup aserfallatsaaliinerullu il. il. Nukissiorfinni ataatsimut katersorneqarnissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.

(inatsisartunut ilaasortat, Kalistat Lund, Anders Olsen, Vivian Motzfeldt, Bendt B. Kristiansen aamma Mala Høj Kúko).

Inatsisartunut ilaasortap Peter Olsen, Inuit Ataqtigiinneersup aama Sanaartornermut ataatsimiititaliami ilaasortat siunnersuutaat ataatsimoortillugit Partii Naleraq sinnerlugu imannak oqaaseqarfigissuarput.

Tamatta isumaqtigiissinnaavugut ullumikkut innaallagissamik pilersuinermi kiassarnermullu atuinitsinni erngup nukinganik atuinitsinni aamma innaallagissiutinik uuliamik atuiffiusuni atorluaanngippallaarpugut.

Tassami assersuutigalugu siusinnerusukkut Naalakkersuisunut apeqquteqaatigisartakkama ilaanni oqaatigineqarpoq, innaallagissiorfinni uuliamik atuiffiusuni ukiumut kiak maangaannartinneqartartoq kr-inngorlugu 39 million kr. missaani naleqartoq.

Illumullimi taannaanarluunniit eqqarsaatigalugu ukiut tamaasa 39 mio kr-it missai maangaannartinneqartarpata, taava kialluunniit takusinnaavaa ukiuni qulikkaani 400 mio kr-it misai annaasarigut.

Taamaammat pissutissaqanngikkaluarlugut qanoq iliuuseqannginnissamut, tassami taakku 39 mio kr-it ukiut tamaasa annaartakkavut innuttaasut akilersorpaat. Naak ilarpassuisa akissaqartinngikkaluarlugit! tassami takorluuinnartigu inissianut akiliutit ilaatigut affaa angullugu ilaatigullumi affaa sinnerlugu kiassarnermut akiliutaasarpoq.

Pissutsit taamaannerat allanngortinneqartariaqarpoq.

Atuisut akiliuteqarteqqinneqarsinnaanerannik Sanaartornermut ataatsimiititaliap isumaliuteqarnera Partii Naleqqamiit isumaqatiginngilarput, tassa ataatsimiititaliap siunnersuuteqarnermini siunnersuutitp aningaasatigut kingunissai pillugit ilaatigut imannak allamat:

“periarfissaavorli sumiiffinni ataasiakkaani kiassarnermik atuisuningaanniit eqqorneqartunit pissarsiniarnissaq”.

tassami oqareernitsitut atuisut akiliuteqarujussuarpallaarnerat naammareerpoq.

Isumaqarpugut aallaqqaataaniilli pisortat kukkussutaat atuisunut akiligassanngortinneqassanngitsut.

Sanaartornermut ataatsimiititaliap eqqumiigalugu maluginiarpaa, qitiusumik kissarsuuteqarfiit kiassaateqarfiillu qaqugu tunniunneqarnissaat pillugu piffissalersuineq nassuiaammi saqqummiunneqartumi suliarineqarsimanngimmat. Tassami aallaqqaataanili Sanaartornermut ataatsimiititaliap qitiusumik kiassaateqarfiit ataatsimut katersornissaat pingaartillugu kissaatigisimangaluarmagu.

Taamaammat aamma uangut soqutingaarput, soormi kiassaateqarfiit ataatsimut katersorneqarnissaat pillugit nassuiaammi ilanngussisoqarsimannginnersoq ?

Isumaqarpugut aamma kiassarnermut innaallagissamullu akit pimoorunnerullugu apparsarneqassappata, inissiarpaasuit aserfallassimaqisut iluarsaanneqarnissaat, oqorsarneqarnissaallu avaqqunneqarsinnaanngitsaq.

Naalakkersuisut nukissiuuteqarneq pillugu inatsisissamik ukiamut 2017-imi saqqummiussaqaarniarlutik nalunaarput, siunnersuutillu uku itingartinneqarnissaat inassutigalugit, taamaakkalu uku siunnersuutit, taakkunungalugu partiit oqaaseqaataat Naalakkersuisunit atorluarneqarnissaat kaammattuutingaarput, tassami assersuutigalugu taakku 39 mio kr-it ukiut tamaasa maangaannartinneqartartut aamma iluarsiivigineqartariaqarmat.

Taama naatsumik oqaaseqarluta naalakkersuisut akissuteqaataat tusaatissatut tiguvarput.